



Headlines

- उपमुख्यमंत्री सुरिंदर चौधरी होरें जम्मू-कश्मीर च नशे खलाफ इकजुट होइयें लड़ाई लड़ने दा आह्वान कीता ऐ।
- सेहत मंत्री सकीना इतू होरें आखेआ ऐ जे सरकार इस गल्लें पर चेचा ध्यान देआ करदी ऐ जे सब्बे जी.एम.सी अस्पताल खरी चाल्ली कम्म करन ते मरीजें ते विद्यार्थिं गी भलेआं अज्जै-कल्लें दिआं स्हूलतां दस्तयाब करोआन।
- मुख्यमंत्री हुंदे सलाहकार नासिर असलम वानी होरें मुंबई च फिक्की फ्रेम्स कार्यक्रमें दरान जम्मू-कश्मीर गी फिल्में दी शूटिंग लेई इक बेहतरीन ते मुआफिक थाहर दे तौर पर पेश कीता।
- बन्ने आहले जिले रजौरी च कल स'झां सुरक्षाबलें ते आतंकवादिएं बश्कार टाक्करा होआ। सुरक्षाबलें दा तपाशी अभियान जारी ऐ।
- खराब मौसम करी त्र'उं दिनें तगर बंद रौहने मगरा श्री माता वैश्वो देवी जी दी जातरा फही शुरु - जम्मू-श्रीनगर राश्ट्री जरनैली सिड्के पर गड़डिएं दी इक-बक्खी आओ-जाई ब्हाल होई गई ऐ।



Dy. CM -Drugs Menace

उपमुख्यमंत्री सुरिन्दर चौधरी हों सभाजि का नशाखोरी गी भलेया खत्म करने ते सब्भनें लेई शिक्षा दा सुरक्षत माहौल उपलब्ध कराना यकीनी बनाने लेई किट्ठै रलियै जतन करने दी जरूरतै पर जोर दिता।

कल श्रीनगर आहले सिविल सचिवालय च उनेंगी मिलने आए दे इक शिष्टमंडल गी सम्बोधित करदे होई उपमुख्यमंत्री होरें आखेया जे नशाखोरी नै स्हाड़े समाज दे तानेबाने गी बुरी चाल्ली प्रभावत कीता ऐ, जिसी परतियै ठीक करने दी बड़ी मती लोड़ ऐ। मलाटी दौरान शिष्टमंडलै इक जापन उनेंगी सौंपेया जेहदे च नशाखोरी आहली कबैतू गी खत्म करने लेई सख्त ते असरदार जतन करने दी जरूरतै लेई गुजारश कीती गेदी ऐ। शिष्टमंडल नै उपमुख्यमंत्री होरें गी दस्सेया जे तालीमी इदारें च नशाखोरी इक बड्डे खतरें दे रुपै च व्यापी दी ऐ जिसी काबू च करना बड़ा गै जरूरी ऐ ते एहदे लेई सरकार ते समाज दे हर इक वर्ग गी किट्ठै रलियै रलियै कम्म करने दी लोड़ ऐ।

<><><><><><>

Itoo Health

सेहत ते मैडिकल शिक्षा मंत्री स्कीना इतू होरें आखेया ऐ जे सरकार सब्भनै मैडिकल कालजें दे बवस्था आहले ढंगे सिर ते कुशल ढंगै नै कम्म करना यकीनी बनाने लेई दृढ़ संकल्प ऐ इस करियै विद्यार्थियें ते मरीजें लेई भलेया अज्जै-कल्लै दे ढंगै दियां सुविधां उपलब्ध कराइयां जा करदियां न। मंत्री होरें एह गल्ल इक उच्ची सतह दी बैठका च आखी जेहड़ी बक्ख-बक्ख जिलें दे सरकारी मैडिकल कालजें दे कारकर्दगी ढांचागत सुविधाएं ते उपलब्ध सेवाएं, प्रगति ते उपलब्धियें दी समीक्षा करने लेई लोआई गेदी ही। इस दौरान मंत्री होरें जारी परियोजनाएं गी समे-सिर तोड़ चाढ़ने, कम्म कारवाइयें च पारदर्शिता बनाई रखने ते मरीजें दी मयारी दिक्खभाल यकीनी बनाने पर जोर दिता।

मंत्री होरें दोआइयें दी मियाद दे बकायदगी कन्नै जांच करने, अस्पतालें च साफ-सुथराई बनाई रखने ते बक्ख-बक्ख मैहकमे बश्कार नेइमां तालमेल बनाई रखने दी जरूरतें पर बी जोर दिता ते आखेया जे सरकार मैडिकल शिक्षा दे विस्तार ते एहदी पुज्ज खिते दे सब्भनैं हिस्से तोड़ी पजाने लेई अनथक जतन करै करदी ऐ।

<><><><><><>

Advisor -Film Industry

मुख्यमंत्री हुंदे सलाहकार नासिर असलम वाणी होरें मुम्बई च आयोजित FICCI Frames समारोह दे बाहरें केई प्रमुख फिल्म निर्माताएं ते मनोरंजन जगत कन्नै जुड़े दे लोकें कन्नै मलाटी कीती। बैठक दौरान जम्मू-कश्मीर च फिल्में दी शूटिंग गितै सुविधाएं ते शानदार थाहरें ते साजगार माहौल बारे गल्लबात होई। सलाहकार होरें फिल्म उद्योग दे लोकें गी आखेया जे ओ जम्मू-कश्मीर औन ते आपू इत्थे फिल्में दी शूटिंग लेई उपलब्ध माहौल ते सुविधाएं गी दिक्खन। असलम वाणी होरें गी मिलने आहलें च केई फिल्मी संगठन दे मिम्बर शामिल हे, जिन्दे च प्रोड्यूसर्स गिल्ड ऑफ इंडिया, राष्ट्री फिल्म विकास निगम, मोशन पिक्चर एसोसिएशन (अमरीका), प्रसार भारती ते इंडियन मोशन पिक्चर प्रोड्यूसर्स एसोसिएशन वगैरा शामिल न।

<><><><><><>

Poshan Maah

पोषण माह आहले समारोहें दे इक हिस्से दे तौर उप्पर संगठित बाल विकास योजना रामबन आसेआ जिले च सेहतमंद जीवन-शैली गी बढ़ावा देने ते महिलाएं ते बच्चें अंदर कुपोषण गी खत्म करने दे मकसद कन्नै केई कैपें दा आयोजन कीता जा'रदा ऐ। इ'नें कैपें दा मकसद, सत्तदार खुराक ते पूरे-पराते आरोग्य बारै जागरूकता पैदा करना ऐ। इस मौके पर जेहड़ी गतिविधियां करोआइयां जा'रदिआं न उ'ंदे च माहिरें कन्नै सेहत मतल्लक गल्लबात, स्वस्थ बालक प्रतियोगिता ते रचनात्मक रंगोली प्रदर्शन मुख तौर पर शामिल न। प्रतिभागिणें आसेआ इस मौके उप्पर मुफ्त सेहत जांच, आयुर्वेदिक सलाह-सूत्र ते दोआइएँ मतल्लक मदाद, मुफ्त हासल कीती जा'रदी ऐ। इस सरबंथे च होर जानकारी सांझी करदे होई रामबन दे जिला प्रोग्राम अधिकारी जहांगीर हाशमी होरें आखेआ

<><><><><><>

93th Air Force Day

समूलचा राष्ट्र अज्ज भारती वायु सेना दी 93मीं ब'रेगंड दा जश्न मना करदा ऐ। अज्जै दे रोज सन 1932 च भारती वायु सेना दी स्थापना कीती गई ही ते एहदे कन्नै इक ऐसी ब्हाई ताकत दे नजरिये दी बी शुरुआत होई ही जेहड़ी औने आहले केई दहाकें लेई राष्ट्र दी रक्षा समर्थ गी नमां आकार देने दा कम्म करग। इस मौके उप्पर राष्ट्रपति द्रौपदी मुर्मु होरें वायु सेना दे सबनें अधिकारिणें-जवानें, साबका कर्मिणें ते उ'ंदे परोआरें गी बी मुबारकबाद दिती। इस बारै दित्ते गेदे अपने स्नेह च एयर चीफ मार्शल अमर प्रीत सिंह हुंदा आखना ऐ

<><><><><><>

राजौरी जिले दे कांडी पुलस थाने हेठ पोंदे बीरनथुब इलाके च कल संजा जम्मू-कश्मीर पुलिस दे विशेष कार्यवाही समूह S.O.G दी टीम ते आतंकवादियें बश्कार किश चिरै लेई गोलीबारी दी जानकारी हासल होई ऐ। जम्मू दे पुलस महानिरीक्षक भीम सेन टूटी होरें सोशल मीडिया पर इस बारे जानकारी सांझी करदे होई दस्सेया ऐ जे इस सरसरी टाकरे दे बाद पुलस, फौज ते CRPF दियां सांझियां टीमां तुरत उत्थै पुज्जी गेइयां ते पूरे इलाके गी घेरी लैता तां जे उत्थै छप्पे दे आतंकवादी कुदरै नस्सने च कामयाब नैई होई जान। खीरी जानकारी थोने तगर इलाके गी खरी चाली खगालने लेई तुपाई अभियान जारी हा ते बाददू बल उत्थे तैनात करी लैते गेदे हे। हालात पर प्रशासन नै नेइमी तक्क रखी दी ऐ ते होर ब्यौरे गी बलगेया जा करदा ऐ।

<><><><><><>

CS Waterways

मुख्य सचिव अटल डुल्लु होरें जम्मू-कश्मीर च ट्रांसपोर्ट खेतर च आधुनिकरण आहली मुख्य परियोजनाएं दे कम्मै च तेजी आहनने दे निर्देश दिते न। ट्रांसपोर्ट मैहकमे दे कम्मैकाजै दा आकलन करने लेई लाई गेदी इक उच्ची सतह दी बैठक दी प्रधानता करदे होई मुख्य सचिव होरें जम्मू च डरैवर ट्रेनिंग ते रिसर्च इंस्टीच्यूट दे कम्मै सने सांबा च निरीक्षण ते प्रमाणन केन्द्र दे कम्मै गी बी बेल्ले सिर सबूरा करने दी जरूरतें पर जोर पाया। उंनै सिड़क सुरक्षा हीलें दी सख्ती कन्नै पालमा जकीनी बनाने दी जरूरतें पर जोर पाया। बैठक दरान एह जानकारी दिती गेई जे सरकार झेहलम दरेया पर जलमार्गें गी परतियै शुरू करने दी योजना बना करदी ऐ।

इस मौके पर इब्बी दस्सेआ गेआ जे गड्डिएं गी कबाड़ बनाने सरबंधी इक नमी नीति गी मुक्कदा रूप दिता जा करदा ऐ तांजे ट्रांसपोर्ट मतल्लक इक ठोस ढांचे गी बढ़ावा दिता जाई सके।

<><><><><><>

Yatra Resumes

खराब मौसम बारे जारी चेतावनी गी ध्यानै च रखदे होई उपरोतली त्रंऊ दिने तोड़ी बंद रौहने दे बाद श्री माता वैष्णो देवी जी दी यात्रा अज्ज परतियै ब्हाल होई गई ऐ। मौसम विभाग नै 4 कोला 7 अक्टूबर तोड़ी त्रिकुटा दिये पहाड़िये समेत जम्मू प्रांतै दे मते सारे इलाकें च भारी बरखा ते उप्परले पहाड़ी इलाकें च बर्फबारी दी भविक्खवाणी कीती ही, जेहदे चलदे ल्हास-पस्सियां पौने दी शेंका बी जताई गई ही, जिसी ध्यानै च रखदे होई श्राईन बोर्ड नै यात्रा रोकने दा फैसला लैता हा। हून मौसम च सुधार होने दे बाद सुरक्षा स्थिती दी जांच करने दे बाद यात्रा खोली दिती गई ऐ। बोर्ड दा आखना ऐ जे यात्रा पूरी चाली रमानदारी ते बवस्था आहले ढंगै सिर जारी ऐ। श्रद्धालुएं यात्रा ब्हाल होने पर राहत ते खुशी प्रगट कीती ऐ ते पवित्र गुफा च दर्शन लेई ओ माता दे दरबार आहली बक्खी मते उत्साह कन्नै अगड़े बधदे जा करदे न.....

<><><><><><>

Highway

पिच्छले कोई 10 घंटे तोड़ी बंद रौहने दे बाद जम्मू-श्रीनगर राष्ट्री जरनैली सिड़क NH-44 पर गड्डिये दी आओ-जाई परतियै ब्हाल होई गई ऐ।

खराब मौसम पस्सियां पौने ते पहाड़ें परा कुप्पड़ पौने कारण एह रस्ता गड़्डियें दी आओ-जाई लेई बंद रखेया गेदा हा। उआं किश पाबंदियें ते एहतियात कन्नै गड़्डियें दी इक तरफा आओ-जाई दी इजाजत दिती गेई ऐ। अज्ज हलकी मोटर गड़्डियें गी बड़्डलै 7 बजे कोला 10 बजे दे दौरान श्रीनगर थमां जम्मू बक्खी औने दी इजाजत दिती गेदी ऐ- कुसै बी गड़्डी गी जम्मू थमां श्रीनगर आहली बक्खी जाने दी इजाजत नेंई ऐ। लोकें गी सलाह दिती गेदी ऐ जे ओ ट्रैफिक विभाग दे निर्देशें ते हिदायतें दी सख्ती नै पालमा करन। तोंआई जम्मू प्रांतै गी राजौरी-पुंछ-आहले रस्तेया- घाटी कन्नै जोड़ने आहली मुगल रोड हौलियें गड़्डियें दी दंऊ तरफा आओ-जाई लेई खुल्ली ऐ। यात्रियें गी पूरी चाली सौहगा-सतर्क रेहियै गड़्डी चलान ते ताजा स्थिति ते निर्देशें बारे जानकारी हासल करियै गै सफर करने लेई आखेया गेदा ऐ।

<><><><><><>

Winter Onset

पिच्छले दंऊ-त्रंऊ दिने दौरान पेदी बरखा दे कन्नै गै जम्मू-श्रीनगर च स्याल दी शुरुआत होई गेई ऐ ते लोकें गर्म टल्ले बाहल कड़्डी लैते न। नत्थाटॉप, टॉपर धार, सयोजधार ते लीयाटॉप जनेइयें उच्चियें धारें पर बर्फबारी दे बाद सयाल नै अपने औने दा असर दस्सना शुरु करी दिता ऐ। झिगड़े इलाकें च भारी बरखा दे बाद आम जनजीवन पर असर दिक्खने गी लब्बा ऐ। ग्रामीण बाजारें च लोक बड़ी घट्ट गिनतरी च लब्बा करदे न जिसलै जे पत्नीटॉप, नत्थाटॉप ते सनासर होर बरखा ते सैलानियें दे सुआगत दियें तयारियें च न।